



12. aggusti 2011

UKA 2011/95

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Appat qeqqata kommuniata avannamut killeqarfianiit Qaanaap avannamut killeqarfianut kiisalu tunumi piniarneqartarnerisa 15. august-imit 28./29. februarimut sivitsorneqarnissaanut Timmissat illersorneqarnerat piniagaanerallu pillugit Namminersornerullutik Oqartussat nalunaarutaat nr. 8, 2. marts 2009-meersup Inatsisartut 2013-mi ataatsimiinnginnerini allangortinneqarnissaanut Naalakkersuisut sulissuteqarnissaannut Inatsisartut aalajagiiffigisassaattut siunnersuut.**

(Inatsisartuni ilaasortat Knud Kristiansen aamma Siverth K. Heilmann, Atassut)

#### **Tunnngavilersuut:**

Nalunaarut atuuttoq malillugu piffinni qulaani taaneqartuni appat pisarineqarsinnaapput septembarip aallaqqaataniit 28./29. februarimut. Tassani appat martsip aallaqqaataanit manniliulertarnerat pissutaavoq.

ATASSUT-mit isumaqarpugut appat piniarneqartarnerat sivitsorneqarsinnaasoq piniagaasalernerisa ullup aallartiffia 15. augustimut siuartinneqarneratigut. Ullormut pisarineqarsinnaasut allangortinnagit tassa sunngiffimmi pinialuttartunut tallimat inuussutissarsiutigalugu piniartunut 30-it.

ATASSUT-mit isumaqangilagut appat ikiliartulissasut piniagaaffiisa sivitsorneqarneratigut, piffissamimi piniagaaffiligissaanni appat mannilioreerlutillu tukertitserersimassammata.

ATASSUT-mit pingaartipparput nunarput nunani allanituulli nunatta nammineerluni pissarititaanik pilersorsinnaanitta annertunerpaaffissaaniitinneqartariaqartoq.

#### **Pisortanut aningaasatigut allaffissornikkullu kingunerisassai:**

Pisortanut aningaasatigut allaffissornikkullu kingunerisassaasa killeqartorujussuunissaat naatsorsuutigineqarpoq. Taamaattoq nalunaarutip allangortinneqarnissaanut susasaqartunut tusarniaasoqarnissaa naatsorsuutigineqarsinnaavoq.

#### **Inuussutissarsiornermut aningaasaqarnikkut allaffissornikkullu kingunerisassai.**

Inuussutissarsiortunut pitsaasumik kinguneqassaaq piniarfissaasa ullunik 14-nik sivitsorneqarneratigut isertittagaasa annertusinerinik kinguneqassammat. Inuussutissarsiortunut aningaasartuutaanissaa naatsorsuutigineqanngilaq.

#### **Innuttaasunut aningaasaqarnikkut allaffissornikkullu kingunerisassai.**

Innuttaasunut aningaasatigut allaffissornikkullu kinguneqarnissaa naatsorsuutigineqanngilaq, innuttaasulli sivilunerusumik piniarsinnaalerneranik kinguneqassaaq.